

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 55-56 (1969-1970)

Artikel: Ina scarschentida notg

Autor: Duff, Paul

DOI: <https://doi.org/10.5169/seals-881516>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>

INA SCARSCHENTIDA NOTG

DA PAUL DUFF, CUERA

A Sumverd

Loschamein paradecha il bi vitg puril de Sumverd giud la biala spunda sulegliva. Per il solit ei Sumverd suleraus la damaun en glischonts radis dil sulegl verspentin. Oz d'enton — il di che nus entschavein nossa historia — sesguscha ina brentina grisch-freida della spunda neuagiu ed enzuglia vitg e contrada en in vestgiu fustg e malenperneivel.

En sia aclaa Marengia, situada in tschancun sur il vitg orasi, fuva Vic Tschaler — in pur che pegliava adina il di per il tgau — semtgaus cun crieck e menadira per ina dètg arada. Gest cun l'otgavla frida dell'ura baselgia lai Vic fitgar il crieck en la dira crusta della risteina, pren la capiala en maun ed entscheiva l'oraziun usitada. Il manever cun la capiala ei era in segn per ils auters luvres, ils quals consistan ord commembers de famiglia. Il tat Sep Maria penda sia capetscha de miserocla sin il moni de sia fassuira de tagliar risteina, la quala el braunca cun ses mauns rubigliai. Ils treis mattatschs Gusti, Florian e Paulin e sias duas soras Annita e Cornelia separticipeschan tuts dell'oraziun cun pli u meins gronda devoziun. Suenter l'oraziun mira il bab Vic aunc ina gada dretg e seniester che tut seigi en uorden. Cun in ferm e decidiu hü lai el fitgar il crieck per l'emprema zugliada.

Il Grischel ed il mutg — dus zun differents animals — mavan gia per il tierz di in sper l'auter en zugl e s'accordavan dètg stupent. Il Florian che fageva igl empaladur haveva giu all'entschatta digl emprem di bravamein dischuffi cun il maluliv pèr, haveva denton cun bien inschign mussau ch'el seigi carschius per siu post d'empaladur. Far endretg igl empaladur tier Vic Tschaler fuva buca adina lev. Inschignus sco lez fuva verteva el buca bugen memia grondas variantas en siu program de lavur. Sco unschiu e culau mava la menadira pacificamein d'ina risteina a l'autra.

Paulin in buobet zaclin e falomber, mo svelts e veglionts, mava oz suenter la menadira cun omisdus mauns en sac e la gheisla sut bratsch. Il mutg haveva bingleiti encurschiu ch'el vegneva buca ugliaus cun la misla sco il solit ed haveva entschiet a seschar anavos bravamein. Quei ha giu per consequenza ch'il Grischel ha survegniu il surmaun e tratg il crie ord zugl. Entras quei manever ei era il bab Vic vegnius tratgs empau vi e neu e cun in dètg giap ha el destadau il semiader Paulin ord la sien.

Neu tuttina inagada suenter ti tappalori e pren gleiti ils mauns ord sac, ti buglialatg che ti eis in. Cheu selai era il tat udir: o esser sei lu schon era ina stoda ferdaglia, ina ferdaglia de quel-las, ins havess sez mustgas ded ira culs mauns en sac, esser sei damaun mundi, jeu hai mo ina marveglia tgei che quels paupers tiers manedels vulan magliar sin pastira cu igl ei strusch ora in fegl aunc. Na gliez, in'aurasut de quellas, quei fa lu catschar latg las cauras.

Cheu dat il Vic bugen raschun al tat. Jeu sai buca capir nua che quella glieud han il tgau de far mundi en de quell'aura. Cun quei puntili taglian ei en sia atgna detta.

Quei tema ha dau ina gada de pli caschun al tat de critisar las ideas novas e modernas. Pli baul fagev'ins mundi suenter l'aura e tenor cunvegnientscha: oz di ins semplamein ils 20 ei mundi e basta. Encunter la sabientscha ded oz dat ei nuota de batter. Jeu fuss insumma dil meini de salvar nossas cauras en nuegl e perver: ussa ch'ins veva mess neu ellas cun pulits ivers e stuer catschar cun cavrer, na gliez, tgei tgaus.

De schar ira cun cavrer vegn gnanc en damonda, di il Vic. In pèr dis sa il Paulin pertgirar elllas in'urial'en di cheu sin nos praus e sco che nus vein dau ina cun las lavurs saveis vus dus prender elllas ed ira a mises. Sin quels davos plaids dil bab fa Paulin in segl ad ault della legria.

Denton fuvan Grischel e mutg puspei mess a pantun mintgin en siu plaz e vinavon va la caravana. Il pign accident haveva nuota pudiu midar temperatura e tuttina haveva Paulin ussa ils mauns dil tuttafatg ord sac. Al mutg fuva el ferm decidius de far vendetga per sia filistucca buserada. Senza che enzatgi encorschi mesira el al mutg ina cun la gheisla sut il venter enasi che quel fa in segl e bunamein derscha il Florian culs peis ensi.

Mo lev — mo lev — ti palander, grescha Florian e lai suan-dar in pèr aviras che havessen in'autra gada permalau il Paulin autruisa, quella gada denton ha el — per las aviras de Florian — mo in surrir malign sut la capetscha neuado. Il patratg de gleiti saver ira a mises cul tat e la cauramenta haveva scaldau ad el piuts e manutta.

A Runcaglia

Tier la vischnaunca de Sumverd auda era il vitg de Runcaglia. Las aclas de quels dus loghens confineschan per gronda part ina cun l'autra. Per il medem di grischartsch dils 19 d'avrel fuva Luis Casutt de Runcaglia sin sia acla a Foppas vid il metter truffels. Assistius en sias lavurs fuva el sulettamein da siu nevs Hermann, fegl de siu frar Pieder a Sumverd. Bein gidava era la Gada, dunna de Luis, in per uras cu ella vegneva cun la tschavera: sia truscha de casa cun ses treis pignets lubeva denton buca de star ditg sil funs.

L'aura fuva quei di leu era a Runcaglia buca stel meglier che a Sumverd, aschia che era il raschieni denter il Luis e Hermann sedifferenziava pauc de quel dils Tschalers a Sumverd. Medemamein fuva Luis buca cuntsents cun il far mundi. Cuntraria-mein de Vic Tschaler saveva il Luis tarmetter negin a mises cun sia cauramenta. Catschar ellas cun cavrer leva el aschi pauc sco il Vic. Perencunter haveva il Luis denton in auter avantatg en sia situaziun.

Vi Ruinatscha possedeva Luis in'acla serrada cun classena entuorn entuorn. Vi leu dueva Hermann ussa pertgirar ellas duas urialettes per di, sera e damaun. Da quella sligiazion fuva principalmein Hermann fetg incantaus, saveva el cheutras mussar ch'el seigi pipa de far enzatgei fetg impurtont sur sesez.

La sera dil medem di mida Hermann nuegl cun sia muntnera. Dapi quei di fa el il viadi da Runcaglia o a Ruinatscha duas gadas per di sco in'ura. Tut mava stupent e Hermann haveva in plascherun cun siu muvel. Empau in utschi de discletg sco el fuva, dueva el buca saver selegrar memia ditg de siu success. In di capeta ei cun el a Ruinatscha ina stoda malemperneivladad.

Arrivond Hermann la sera encunter nuegl auda el in scadenem che lai sminar buca bien. El tila la comba pli da miervi e

vegn sin esch nuegl plein flad. Scochemai vesa el il succedi e peglia buca pintga tema.

Enstagl ded esser rentada en siu plaz fuva la gaglia gronda sin punt odem nuegl e scudeva la strala de tingherlins buca schi strusch. En sia gretta tschaffa Hermann in fest de faners e mesira alla gaglia davos ils corns enagiu che quella dat enschanuglias e revolva ils egls. De gliez fa Hermann denton buca pli bia stem pil mument. Tut da prescha liberescha el la strala — che era stendida vid sia cadeina e catschava ora la lieunga dil ridischen — ord sia penibla situaziun. Pér lu pren el la gaglia — che fuva puspei revegnida — per las ureglas e complimentescha quella en siu plaz, buca senza aunc inagada tractar ella cul fest suenter notas. Ni la gaglia ni la strala han quella sera tuccau en de magliar e Hermann saveva ussa buca tgeinina meritassi compassiun.

La sera de tscheina ha el in pèr gadas pegliau catsch per confessar agl aug la filberga, damogna denton tuttina buca sur sesez de vegnir ora cul marmugn. Agl aug Luis eisi sulettamein curdau si che Hermann ha quella sera fatg empau prescha ded ira a letg. Durmiu ha Hermann miserabel, il remiers de cunsenzia ha mudergiau el l'entira notg.

Gia carteva Hermann che l'entira historia hagi neginas consequenzas pli, mo cheu betta la strala il tierz di ansiel. Quella sera peglia el curascha e confessa suenter tscheina l'entira historia agl aug. Ina buglialatg fuva Hermann tuttavia buc ed ina gada decidius stat el tier la caussa en mintga detagl. In pulit lavatgau ha suandau siu confess, buca il davos perquei ch'el veva schau d'annunziar il fatg immediat. Consternius e buca senza remiers de cunsenzia eis el ius quella sera a letg.

Denter Luis er Hermann ei la caussa buca pli vegnida ventilada cun in soli plaid. Luis Casutt fuva tuttavia buca in nausch patrun ed el saveva beinavunda che quei discletg havessi gest aschibein era saviu capitlar tier el. A Ruinatscha ha Hermann fatg vinavon sia caussa exactamein. Surtut ha el dacheudenvi adina mirau bein e scogliauda che tut seigi rentau. Da di per di spetgava el pli e pli vess de gleiti saver ira a mises. Che in discletg aunc bia pli grond spetgi sin el a Planezzas sminava ni el ni gl'aug Luis.

Tat Sep Maria e Paulin a Planezzas

L'aura d'avrel seigi semeglionta allas lunas dils carstgauns, havevan ils vegls per moda de dir. Ella sappi semidar dad in di a l'auter. Suenter in pèr dis crius e freids ei l'aura serefatga ed il di desiderau ded ira a mises ei arrivaus per Paulin. Ils 27 d'avrel — in di serein e bi — semova ina cadeina de cauramenta della teissa e carpusa via della val Sumverd enasi. Or davon sespuranava il Grischel de Vic Tschaler cun sia carga dad in teis a l'auter. Il Grischel fageva quella via per la tonta e tont'avla gada e saveva exact nua ch'el haveva de star eri per ruassar senza stuer tener la carga cun tutta forza.

Entuorn miezdi arrivan ils Tschalers a Planezzas. Da quei temps fuvan aunc negins vischins en la val. Malgrad il grond plascher pareva ei tuttina empau curios a Paulin ded esser cheu cun il tat tut persuls. El seconsolava cun la speranza che Hermann arrivi ton pli gleiti. Il mises dils Casutts e quel dils Tschalers confinavan in cun l'auter. Quel dils Casutts fuva pli che il dubel pli gronds e per part fetg spundivs, ferton che quel dils Tschalers fuva mo planira. Capeivel che las cauras dils Tschalers fagevan all'entschatta enqual viseta allas spundas sulegliavas dils Casutts. Il pensum de Paulin fuva ussa de pertgirar sia cauramenta giud las spundas dils Casutts. Quei mava buca adina da sez per aschiditg ch'ellas savevan buca prender la via dellas bleissas enassi. Ina gada che l'iarva pudeva catschar ora els autls vegnevan las cauras dil Vic e quellas dil Luis mai pli en contact. Quellas dil Luis prendevan lu adina la direcziun sur il mises enasi encounter ils Barschaus, ferton che quellas dil Vic mavan lu sur punt e dellas bleissas enassi. Perencunter vegnevan ils vischins sez pli bia en contact in cun l'auter. Darar ch'ei vegni tralaschau ina viseta al vischin las seras de matg. Da quellas visetas stueva Paulin desister ad interim e quei fuva per el il pir.

Ils dis vargan. Las lavurs quotidianas vegnan fatgas mintgadi en in tun empau monoton. Cuschinar, mulscher e rugalar la muntanera, far lenna, rugalar in tetg ni ina seiv. Il cupid da miezdi udeva medemamein en quei program monoton. Quei fuva denton il sulet punct che Paulin teneva buca en el program. Duront il sien dil tat s'occupava Paulin cun sias vaccas lenn e menadiras. El possedeva las pli bialas vaccas lenn de tuts ils buobs de mises ch'el enconuscheva. En quei fatg fuva

il tat in ver meister. Denton era quella occupaziun cumentava buca Paulin alla liunga. Ina gada che Hermann fuva lu puspei cheu deva ei variaziun e cuorturiala. Tgi sa cu Luis e Hermann arrivan.

Ils Casutts vegnan

In di che tat Sep Maria fuva ius a durmir suenter gentar fuva Paulin puspei occupaus cun sias vaccas lenn, buca senza dar da temps en temps ina egliada da via orasi encunter igl uaul. El carteva senza fallir ch'ils Casutts vegnien oz. Vonzei seglia el a sparuns da tegia neuaden clamond: tat — tat — ils Casutts vegnan! Il tat leva plaunsiu e plattamein e vegn avon tegia. El mira siado encunter gl'uaul senza denton cattar ni cauras ni biestga. El di a Paulin — buca senza in surrir malign: jeu crei che ti siemies da bi clar di. Na na, jeu siemiel nuot, jeu hai udiu clar e bein las stgellas dils Casutts. Paulin fuva enconuschents per in specialist en quels graus. El enconuscheva mintga stgella e mintga tgau en la vischinanza. Cheu duvrava negin semiserar cun el. Quei saveva il tat beinavunda. Pign mument ed ils em-prems tgaus comparan ord igl uaul. Suenter las cauras vegn il Hermann, lu la biestga ed in tschancun anavos il Luis cun la vacca de casa davon la bena. Cun schuls e gibels dattan ils mattatschs sinzur in a l'auter. Ils Casutts ein arrivai e cun els la gornda midada per Paulin. Pér uss entscheiva la vera veta de cuolm per ils mattatschs.

Ils bials dis de matg vargan a Planezzas sco de singular. Il cucu vegneva da di en di pli e pli raucs. Reguladamein vegneva ei iu la sera a vischins, ina gada ensi ed ina gada engiu. Quellas uras fuvan per lunsch ora las pli bialas per ils mattatschs. Cun bucca e nas tedlavan els las raquintaziuns de bravuras dils umens. Pli baul haveva Paulin udiu tals raschienis a Mulins nua che Vic Tschaler haveva in secund mises. Leu gudevan ils mats Cadetg e Vic Tschaler la medema casa de mises, aschia ch'ei muncava buca ina solia sera ch'ils umens sesevan ensemes e raquintavan episodas veras e nunveras. Principalmein il Carli Cadetg saveva raquintar oreifer. Buca per nuot fuva el catschadur cun tgierp ed olma. Lezzas seras leu emblida Paulin buca aschi spert. Ussa teidla el cun plascher ensemes cun Hermann ils raschienis dil tat e dil Luis.

Luis Casutt en temas e pitgiras

Anetgamein dat ei ina hanada interrupziun en il program de visetas a Planezzas. Tat Sep Maria e Paulin spetgavan sin il Luis e Hermann. Per far ira vi l'uriala han els entschiet a cavegliar lenna avon tegia. Vonzei di Paulin: tat — il Luis ei cheusi. Vulvend il tgau vesa Sep Maria daveras il Luis si osum il rieven sesend e tenend il tgau en omisdus mauns. Sminond buca tut bien ein els immediat ira si encunter. Arrivai sin cuorta distanza damonda Sep Maria: schia — has tschenau e rugalau. Naba — rispunda Luis: jeu spetgel sil buob, quellas stoda cauras ein buca vegnidas questa sera e jeu hai tarmess il Hermann in tschancun enasi per mirar ded ellas ed ussa vegnan ni cauras ni buob neunavon. Sin quei di Sep Maria: o quel vegn bein a vegnir vonzei, il Hermann mira segir nua ch'el va, gliez fuss ei lu mender cul miu, lez va adina sin tgauras alvas e mira mai tgei che schabegia davon e davos el. Il Hermann ei in buob curaschus e precaut. Gie, forsa mo memia curaschus, di Luis. Ins sediscuora aunc in mument da quei e da tschei e lu sedecida Luis ded ira a far tscheina, ils plaids de Sep Maria vevan tuttina dau ad el ina certa quietezia. Ei vegn dau la bunanotg, buca senza la cunzina d'en tuttacass dar sinzur.

Arrivai en tegia derscha il tat aunc ora ina scadiola caffe ch'el veva mess a cauld sin pegna. Denton fuva Paulin gia sut ils ponns ed avon ch'il tat vegni de stizzar la cazzola fuva el gia sedurmentaus. Plaunet tila la notg ses umbrivals e lai anavos a Planezzas in um en quitaus e panzieris.

A Mulins

Sco detg possedeva Vic Tschaler aunc in secund mises a Mulins il qual confinava cun quel dils mats Carli e Geli Cadetg. La casa de mises gudevan els gia da haheias enneu comunabla mein. Gia dil temps che il bab Risch Cadetg viveva aunc, vegneva quei practicau aschia. Il bab Cadetg fuva vegnius per la veta gia avon in triep onns a caschun ded ina disgrazia. Ils dus paupers mattatschs fuvan restai anavos cun sia mumma ed havevan bien a baul empriu de star sin omisduas combas. Il matg a Mulins prendevan els bugen encunter in cussegl dil Vic, il qual fuva adina promts de segidar culs buns mats. Sco daperut ha il temps era cheu migliurau la greva plaga. Ils dus

mats han beingleiti drizzau l'egliada anavon e manischau il fatg cun etgnas forzas. Ferton che Geli haveva quitau pil muvel se-dedicava Carli pli bia ad autras lavurs. Sco catschadur e mazler de casa ha el beingleiti giu in ferm sutapeis. Da sias episodas de catscha raquintava el cun passiun ed ins vegneva mai unfis de tedlar el. Cunzun ils buobs dil Vic stimulavan adina puspei el de raquintar enzatgei: Aschia haveva il Florian era puspei dumignau el ina sera de matg de far ruschanar della catscha digl onn vargau. Gest ruschanava Carli d'in combat ch'el haveva giu cun in tschéss ch'ei splunta. Sin il — mo neuaden — curdaus ord treis buccas enina, entra il Balzer Caflisch de Tumma. Quel fuva il meglier amitg dils Cadetgs. Da Tumma a Mulins fuva ei in brav tschancun, denton, tgei fan mats de cuolm buca tut per ina sentupada? Ditg ein els buca seteni si a Mulins. Ils treis schanis havevan fatg giu ded ira a Chischnes a mattauns tier ina matta ch'els savevan che fussi leu cun siu bab. Al Vic eisi stau fetg endretg ch'ils mats ein i questa sera; aschia ha el saviu ira a bun'ura a letg. Meins d'engrau eisi stau a Florian; quel vess pli bugen cuntentau sias marveglias, cun quels raschienis che vegnevan menai ina sera ora deva ei adina de veginir sissu enzatgei che vess tschelluisa mai contonschiu sias ureglias. Per questa sera fuvan las speronzas satradas, denton dueva Florian endriescher gl'auter di enzatgei che fageva ad el buca meins plascher, quei denton saveva el aunc buca sminar.

Il dubel lavatgau

Suenter che Geli, Carli e Balzer ein stai naven va Florian immediat a letg. Il bab Vic legia aunc in mument la Gasetta e serenda lu vonzei alla finiastra. Ina immensa stgiraglia e plover plov' ei dil bi e dil bien. En quei mument ch'el vul puspei serrar la finiastra dat ei ina detga camiada suandada d'ina tunada che fa stremlir l'entira tegia. Bien appetit di el, patengond vid ils treis ménders della notg. Quels veggan a survegnir il dètg lavatgau.

La dracca ei buca stada il sulet e pli grond lavatgau ch'ils ménders de Mulins han survegniu quella notg. Arrivai a Chischnes han els igl emprem mument secartiu ded esser secavalai orasileu per nuot e meins che nuot. Dapertut stgiraglia e silenzi. Tuttina s'avischinan els bufatg alla tegia de Rest Depuoz.

Cheu vesan els atras ina sgrema dil barcun cazzola en stiva. Che ils barcuns fuvan serrai en haveva finfatg sia muntada. Per ordinari restan quels aviarts di e notg tier in vischin sco tier l'auter, e pervia della dracca havev'ins era buca serraue en els, pertgei lezza haveva entschiet pér avon pign mument. Suenter in silenzius mumentin audan els vuschs en stiva. Cun breigia pon els constatar las vuschs d'ina femna e de plirs umens, pia fuva la Catrina cheu, denton buca mo cul bab; ei stueva aunc esser enzatgi auter en stiva. Per muments vegnan las vuschs pli fermas, mo d'enconuscher gnanc raschieni buc. Puspei ei cheu il Carli quel che peggia igl asen per il tgau e buca per la cuu. Tgi che ei en cheu stuein nus vegnir sissu, speranza ei gl'esch-tegia buca serraus. Bufatg bufatg sesluetan els davos tegia si. Igl esch fuva buca serraus cun la clav ed en in dai ein els vid igl esch-stiva. Carli ei gl'emprem che catscha sia testa, cuvretga cun in piez de vischala ch'el veva pudiu tier en cu-schina, en dad esch. El ei era gl'emprem che retila anavos sia testa senza dir in soli sulet plaid, vesend en stiva ils dus mén-ders de Valsut. Sep Carisch e Gion Cartel sesevan en stiva a meisa cun Catrina ed il bab Rest Depuoz. Il Gion Cartel, num-naus il Gion grond, valeva per in dils pli maluardai rampuns della vischnaunca. «Lignei ina gada tgi ch'ei en cheu a pus-chegn», di Carli siper ses dus cumpogns. Lignau han ni in ni l'auter, udend denton de tgi ch'ei retracti leva il Geli prender la via sut ils peis e turnar immediat danunder ch'ei fuvan vegni. «Na na», di Balzer: «mo per semenar essan nus nuota vegni orasi cheu en quella dracca, silmeins il puschegn ston quels dus metschafadigias fadiar questa notg. La Catrina dueigi haver siu plascher cun ses dus cavaliers.» Versai ch'els fuvan en de quels fatgs, han els gleiti giu studiau ora la filiberga. Els se-decidan de svidar il begl e purtar quel avon tegia e puspei em-plenir cun aua filastre. Cun tutta precauziun van els alla lavur. Rest Depuoz haveva viu il tgau gries che veva cuchiau en dad esch e saveva strusch capir ch'ils baus della notg fussien puspei svani senza schar anavos fastitgs. El vul serender agl esch, vegn denton retenius dal Gion. Quels schanis stuein nus pegliar, di el. Vus auters mo discurri vinavon sco sch'ei fuss capitau lidi nuot: jeu sesluetel bufatg orda finiastra e mon vi davos clavau e laghegel tgei ch'els traffican. Sche jeu schulel vegnis vus dus immediat dad esch ora e deis a dies ad els. Naturalmein ha-

vev'ins buc in'ideia cons ch'ei fussen, mo gliez intressava buca la massa il Gion; per el quintava en de quels cass adina mo la qualitat e buca la quantitad.

Detg e fatg: Gion vegn ded arver barcun e finiastras senza la minima canera. Precautamein selai el orda finiastra e contonscha il plaun mettamein. Cun dus sbargats alla metta eis el vi sut nuegl e davos clavau si. Leu, dalla cantunada anora sa el contemplar ruasseivlamein ils utschacs vid la lavur. El lai emplenir els il begl tocca sum e dat lu il secunvegniu schul. Cun in sdrap sesarva igl esch-stiva e neuado seglian Sep e Rest. Quei ei stau la détga surpresa per ils luvrers della vegna dil vischin. Nunsavend danunder ch'il schul fuva vegnius, seglian Carli e Balzer vi encounter il clavau e gest en las toppas de Gion. Geli, en sia reacziun planoria, ha en siu retard aunc viu il pri-ghel vi sur clavau. Cun ina spertadad ch'ins havess mai sminau, seglia el si sur tegia vi e vegn de mitschar. Pér giu sur gl'uaul ughegia el de star eri e mirar anavos. Negin che haveva per-sequitau el. Sep e Rest havevan dau agid al Gion che veva sur-vegniu dus enina en sias greflas. Il Gion ha fatg cuortas cun ils dus schanis; en de quels fatgs haveva el negina misericordia cun sias unfrendas. Carli e Balzer sescomian giu de far bogn el begl ch'els havevan semptgau cun tonta premura per Gion e Sep.

Las marveglias — e buca la curascha — havevan puspei catschau anavos il Geli. Gia in tschancun sut tegia udeva el il sblatschergnem si avon tegia ed el ha immediat saviu s'imaginar la muntada de quei sblatschergnem. Tonta curascha sco questa sera haveva el aunc mai giu. Puspei seslueta el si sur tegia neu cun in terment tschespet enta maun. Promtamein mesira el quel giu en la totona al Gion che quel cupida davon giu. Quei manever ha disturbau il program de bogn taluisa che Carli e Balzer ein vegni de scappar. Quella gada ein tuts treis sereteni pér giudem gl'uaul. Geli ha buca ditg teniu zuppau siu plascher sur dil bogn de ses dus cumpogns. Buca ch'el fussi staus schetgs, mo en comparegliaziun dils auters, astgava el aunc esser cun-tents cun sia situaziun. La dracca haveva ussa schau suenter e tuttina han ils treis herox buca fatg liungas a Chischnes.

Returnai a Mulins seslueta Geli bufatg en tegia e sdrappa giud clavella davos pegna empau resti mo a gartetg. Vin clavau han ils giatels sescumiau e semess a durmir sil fein. Gl'auter di

ha il Vic bein viu il resti bletsch, denton carteva el che quei derivi dalla dracca della notg vargada. Propi la raschun della palaunca bletscha vin clavau ha el intervegniu pér il di della cargada. Gliez di ha il Rest ruschanau a zacons pursanavels dil bogn a Chischnes, senza saver tgi ch'els hagien atgnamein giu enta pugn. Zuppadamein pudeva il Vic rir tut persuls. Ina gada cun caschun leva el strihar quei sut il nas vi als treis herox.

Hermann sin la tscherca dellas cauras

Cun la stricta cunzina de gie buca ira memia lunsch e surtut buca el malsegir, haveva Luis tarmess il Hermann in tschancun enasi encunter ils Barschaus. Arrivaus enasisum la bleissa dil mises, tschancuna Hermann gl'uaul e vegn viaden encunter Crapdebos. De cauras ni pei ni palegn, quellas stuevan esser en davos la Muota e tochen en leu pudeva el aunc arrivar avon ch'ei entscheivi a far de brin. Senza ceremonias e ditg studiar pren el la via sut ils peis. Tschuncanond gondas, crests e vallettas arriva el plein flad en la Muota. Sia surpresa ei buca pintga vesend el era leu buca fastitgs de cauras. Sin siu emprem clom della grugna enasi survegn el promta risposta giu dagl ault della preit-crap. La medema ch'el veva giu tractau a Ruinatscha cun il fest de faners ha rispundi ad el. La gaglia gronda deva adina is ina dellas empremas, quei saveva el bein avunda; el havess denton era tschell'uisa enconuschiu il beschel della gaglia. Tgei pegliar a mauns? — turnar anavos senza cauras, ussa ch'el saveva nua ch'ellas fuvan — na mai e pli mai — quei havess pudiu valer per in Paulin Tschaler, mo buca per il Hermann Casutt. E tuttina: dar dadens la preit enasi havess duvrau bia memia bia temps ed el vegneva segiramein ella notg. Mirond enasi encunter la preit, enquera el de fixar ina direcziun avon che prender la via temeraria. Tenor sia calculaziun stueva ei reussir ad el ded arrivar senza difficultads si suren cun prender la direcziun fixada; la finala fuva quei buca l'emprema gada ch'el mava per la grugna entuorn, quei fuva tuttavia buca l'empremagia che quellas zeplas havevan carmalau el enasi sils Barschaus. Dals prighels e cuglienems della preit aulta saveva nies bien Hermann snueivel pauc. Cun ina curascha ed energia de ver guid, semetta el sin via nunsminond tgei che spetgi el leuenasi.

Sep Maria, Luis e Paulin a Planezzas

Suenter staus esser sespartius da Sep Maria e Paulin fuva il Luis turnaus en tegia. Gl'emprem mument leva el veramein far fiug per metter si la tscheina. Enstagl de tener il zulprin ardent vid igl uadel envida el cun quel la latiarna. Cun quella entamaun va el pliras gadas mets e pagadus dil Plaun-mises enado. De clamar il num Hermann ughiava el buc, per tema che siu clom resti senza risposta. Tuttenina vegn el sil patratg de sez dar enasi encunter ils Barschaus, lai denton puspei curdar quei propiest, beinsavend che quei fussi stau in'interpresa vana. Perencunter sedecida el ded ira giu e clamar il Sep Maria, forsa che quel savess dar in bien cussegl. Ch'ei stueva esser schabiau enzatgei cun Hermann, da quei fuva el ferm perschuadius.

Cun l'emprema frida en la preit ei Sep Maria allerta. Vesend la cazzola a mond davon finiastra vidaneu sa el immediat tgei che quei hagi de muntar. Prest eis el alla finiastra e damonda: eis ti Luis? Sin il gie de quel di el: spetga, jeu vegnel immediat. Cu il tat semeina entuorn per far cazzola, fuva Paulin era gia ord letg ed haveva tratg en caultschas. Cun il tschiep ed ils calzers sin maun seglia el orda finiastra. Las finiastras della tegia fuvan buca pli che in bien meter sur il plaun aschia che la setschentada ha buca saviu fallir. Cun vusch d'anguoscha damonda el: ei il Hermann aunc buca vegnius? Avon che Luis vegni de rispunder fuva il tat è schon avon tegia, e mettamein van els si encunter la tegia dil Luis. Si sut tegia stat il Luis eri e di: tgei lein pomai pegliar a mauns? Cun il Hermann sei segiramein schabiau ina disgrazia. Quei ei nuota detg: di il tat. Contas gadas sei capitau ch'il spariu ei staus anavos avon che la collona d'agid che encureva el. Buca ch'il tat Sep Maria fuss staus aschi perschuadius de ses plaids, el stueva denton encurir de consolar il pauper Luis entochen che il desiderau agid compareva, e ch'ei stoppi dar agid, de gliez fuva il tat perschuadius. A Luis di el vinavon: nus stuein sefidar sin Diu e ver speranza. Quei che nus savein far ussa ei ded ira sin tegia e dir rusari. Senza esser quietaus fuva Luis tuttina engrazieivels per ils plaids consolonts de Sep Maria. Probablamein fuva Paulin darar staus aschi ruasseivels de dir rusari sco quella sera leu.

Hermann en sgarscheivla situaziun

Duront che dus umens ed in buobet schevan rusari cun fervents suspirs sesgarflava leusi en la preit aulta dils Barschaus in auter mattatsch encunter alla segira perdiziun. En sia febra ed anguoscha gnanc sefageva el en che la notg vegni en cuort ad enguttar el leu en la preit. Suenter in stentus sesgarflar ed encuirir stat el tuttenina avon in clauder. In auter de sia vegliadetgna havess en siu stagl entschiet a bargir e burlir. Buca denton il Hermann Casutt.

Dieunuardi: co sund'jeu è serabitschaus enasi cheu, ussa sun jeu piars, pauper aug Luis e... paupra mumma! Siu emprem patratg ei d'encuirir in plaz nua ch'el savessi silmeins seser. In pign tschancunet plinenvi po el aunc tscharner atras il denter stgir e clar in plazzet en la grondezia d'ina pintga meisa. Leu giusum catta el mo vessamein in tschaffun che pareva d'esser bein francaus. Quei plaz stueva el contonscher per tut prezi: star cheu e spetgar sin l'alva dil di fuss stau ton sco de gest sebetter sur la preit giu. Medemamein saveva il pass tochen tier il tschaffun esser sia mort, in pass falliu ed el fuva en la profunditad. Pér ussa roclan ad el grossas larmas della vesta giu. Il Hermann che saveva buca seregurdar de ver bargiu la davosa ga bragia ussa petramein. Denton mo il tschaffun sa aunc esser sia liberaziun. Sia gronda curascha dat ad el forza e sia forza dat ad el curascha. La notg catscha el a cantun e lai buca ditg temps de ponderar. Cun in maun urenta el il tschespet vid il grep: quel tegn. Igl emprem pass sin in pign carpugl dil plattiu ei fatgs, ed in anavos dat ei buca pli. Co el ei la finala arrivaus vi sin il pastget sa el buca de dir. Cun tutta precauziun urenta el il tschaffun e semetta lu cun ina comba d'ina vart de quel giu e cun l'autra da l'autra vart. La notg ei cheu ed il combat cun la sien entscheiva. Sper el vegliava denton aunc in auter quella notg: siu car e bien aungel pertgirader.

Ils mats de Tumma

Suenter il rusari tuornan ils treis cussadents de Planezzas puspei ordaviert e van mettamein cun sia cazzola dil plaun enado. Mintgaton rebatteva in clom enasi encunter gl'uaul.

A Tumma sesevan treis mats a meisa e schevan aunc ina gada reviver il bogn della sera avon a Chischnes. Gel Cadetg

cudizzava ses dus cumpogns buca aschi strusch. Era deva el a quels tutta cuolpa dil schabettg. Sche vus vessest Tedlau sin mei sche fussen nus i per nies fatg cu nus vein viu il Gion grond en stiva. Il mument che Geli pronunziescha quels plaids steva il Balzer gia per la tiarza gada sin finiastra e catschava il tgau viado en la notg ch'el fuss gleiti cupitgaus giuado. Balzer vegn dus pass anavos e dat in'egliada sin l'ura de cucu che fuva pendida vid la preit sur siu letg. Quella mussava paucas minutias avon las dudisch. Surstaus tuorna el alla finiastra e mira puspei viado ella notg. Ils dus Cadetgs miran in sin l'auter e scrolan il tgau. Il Carli damonda en tun de beffa: tgei vesas atgnamein cheuo aschi interessant che ti miras traso viado en la notg? Quei che jeu vesel cheuenagiu a Planezzas ei en mintgacass zatgei interessant, manegia Balzer. Ni tgei manieis vus che quella cazzola hagi de muntar da quellas uras. Sin quei vegnan era Geli e Carli alla finiastra. Vesend era els la cazzola di Carli en agitaziun: Quei ha veramein buca de muntar bien. Ils de Planezzas ein buca quels che van entuorn per nuot cun cazzola da quellas uras; sche vus essas de miu mein sche mein nus enagiu e mirein tgei che quei munta. En buca ditg ein els sin via encounter Planezzas. En tuttas modas e manieras enquera el ina raschun plausibla per igl ir e turnar della cazzola che els persequitavan aunc adina.

Leugiu serepeteva il viadi dad in cantun dil mises a l'auter sco in'ura. Arrivai inagada odem mises, sepusan ils dus umens in mumentin encounter la seiv. Cheu audan els anetgamein in scutinem de vusch a s'approximond. Gl'emprem mument han els cartiu ch'ei savessi esser il Hermann, denton en quella direcziun fuva gliez strusch pusseivel. Beingleiti han els saviu seperschuader ch'ei fuva pliras vuschs ded umens, las qualas vegnevan adina pli maneivel. Il crap che schischeva a Luis diai uras ed uras sil pèz ei vegnius pli levs. Sep Maria ha dau sinzur als s'avischinonts e sin la risposta de quels ha Paulin immediat enconuschiu la vusch de Carli Cadetg. Quei ei il Carli, di el cun ina certa legria. Luis — il Carli anfla segir il Hermann! Ils davos plaids de Paulin han era ils treis mats udiu e Carli ditg sei cun Hermann, nus vein viu la cazzola da Tumma anora ed havein dubitau ch'ei stoppi esser capitau enzatgei. Enstagl de Luis declara Sep Maria cun cuorts e precis plaids als mats il succediu. Spert decidius di Carli: cheu dat ei buca de piarder

temps. Che Hermann ei en ina schliata situaziun lai buca zuppentar, perquei ston ins buca absolutamein crer il mender. Per Carli fuva ei clar che sia emprema missiun fuva de dar curascha e speranza al pauper Luis. Sevuvend danovamein tier lez, di el: quei ch'ei de far cheu fagein nus! Vus treis meis sin tegia e spetgeis ruasseivlamein sin nies retuorn. Sche quel ei conseleivels ni buc stat sura ad in auter. Sevuvend tier ses camerats di el: vus dus deis da cheu enasi en la direcziun che Hermann ha priu. Surtut en Crappa grossa fagei bein adatg, igl ei tgunsch pusseivel ch'el ha leu en la gonda strubiau ni schiglioc fatg mal ina comba. Da leu deis vus viaden encunter la Muota, leu spetgeis vus sin mei. Jeu mon en Plaunburschina e mirel de survegnir aunc enzacons buns umens. Sche Plazi Truaisch ei leu sche vein nus schon gudignau debia, quel enconuscha ils Barschaus sco il sac de sias caultschas. Ed ussa curascha, mia glieud. Cun pass rapid camina el encunter Plaunburschina. Cun la ferma speranza ch'ins anfli Hermann sauns e salvs, sedurmenta Paulin circa ina mesura suenter sin baun-peyna en stiva dil Luis.

Sin la tscherca de Hermann

En stiva de Gion Antoni Cagienard a Plaunburschina veseva ei ora sco en ina sala de vischnaunca. Las duas cazzolas pendidas vid il plantschiu amiez la stiva devan mo ina brausla glisch atras la gronda fugascha che secatschava ad ault. Gion Antoni fuva cauvitg e veva schau vegnir ensemens ils umens per concluder cu ira a mundar pastira. Tier talas sesidas fuva ei cappeivel ch'ei vargava mesanotg avon ch'ins setschechi ded ira a casa. Per ventira fuvan entgins s'entardai oz dil bi e dil bein. Leci Raschein e Lucas Pally fuvan gest giu sper igl esch semtgai de dar la bunanotg, ch'ei splunta on cuschina. Per in mument ein ils umens perplex. Tgei po ina viseta pomai muntar da quellas uras? Targlinond leva Gion Antoni en pei e va ad arver. Buca pintga ei la surpresa vesend el il Carli Cadetg avon esch. In vischin de Ruinatscha havess el aunc saviu capir pér da quellas uras, buca aber in mat en da Mulins. Entrond Carli en stiva vesan ils presents scochemai che buca mo la casualidad haveva menau el neuadencheu. Carli lai era buca spetgar ditg sin ina declaranza. Denter ils presents sedeclaran immediat

quater promts de separticipar della acziun. Sin insista de Carli van ins aunc a clamar Placi Truaisch che fuva ius avon pign mument e saveva struschamein esser a letg. Udend lez dil schabettg eis el immediat promts de dar agid. Provedi cun cazzolas de carbit e latiarnas de petroli, sugars e terscham semetta la colonna sin via encunter Crapdebos. Da leu anora van ins en duas gruppas encunter la Muota.

En la Muota spetgavan Geli e Balzer cun malpazienzia sin igl agid de Plaunburschina. Gia daditg havevan els observau las cazzolos e savevan ussa che Carli hagi giu success a Plaunburschina. Els sezs havevan schon dau si tutta speranza d'agid. Beingleiti ein ins s'entellius cun segns e cloms. Arrivai alla Muota tschenta Carli a ses dus cumpogns de Tumma la damonda: haveis festisau nuot? Nuot ed aunc inaga nuot! — ei la risposta. In penibel silenzi suonda. Placi Truaisch che haveva ussa surpriu il commando rumpa il silenzi e stimulescha de prender posizion. Ins sedecida de sereparter en treis gruppas. Geli e Balzer duevan puspei prender direcziun encunter la Gonda grossa e lu dar enasi encunter la preit aulta. Placi Truaisch, Gieri Raschein e Leci Pally vulan dar da miez viado e lura turnar in tschancun pli ad ault puspei anavos. Il Carli, Sep Detragisch e Victor Bundi han la missiun de turnar in tschancun encunter Crapdebos e dar da leu anora enasi encunter la preit. In terment carpun si sut la preit dueva esser il liug de rimnada. Suenter haver instruiu tuts bein e sco sauda ariguard segns e signals dat Placi la cunzina de partenza.

Gia fuva Carli marschaus ina pulit'uriala cun sia gruppach'el stat anetgamein eri sco schiraus. Haveis udiu? — di el. Enstagl ina risposta stattan Sep e Victor eri sco miurets ed ughegian strusch de trer flad. Tut spetgar gida nuot, negin stec pli. Strusch ch'els han puspei giu fatg diesch pass stattan tuts treis puspei eri sco sin camond. Quella gada havevan els udiu clar e bein. Schizun la direcziun danunder che la stechiada fuva vengnida, quintava Carli ded haver anflau ora.

Suenter circa in'ura ein ins s'entupaus en il liug secunvegniu. La grappa de Carli fuva la davosa sil plaz e vegn retscharta cun la damonda: haveis era anflau nuot? — Anflau buc, aber udiu, ei la risposta. Tuts miran surstai in sin l'auter. Nus havein udiu las cauras cheusi sur la preit. Che Hermann seigi era leu ei strusch de supponer, el stuess en gliez cass haver viu las ca-

zolas e lu havess el segiramein dau sinzur. Suenter in mument de ponderaziun di Placi Truaisch: la caussa ei en mintga cass fetg seriussa. Sch'il buob ei buca leu si cun las cauras, lu sto el ver empruau de dar atras la preit enasi per ir la via cuorta e lu stat ei mal cun el, ton ei segir. In versau catschadur vegrn atras la preit da di, aber mai e pli mai da notg; co duess lu aschia in mattatsch nunversau contonscher ei? Nossa missiun, schi tresta sco l'ei ussa, fuss d'intercurrir manedlamein il teritori sut la preit-crap enado. Per far quei sistematicamein settschentein nus si en fuorma de cadeina in sur l'auter cun ina distanza de circa 15 — 20 meters in ord l'auter. Far stem e controllar la pli pintga caussa secapescha da sesez; scochemai che in ni l'auter vesa enzatgei dubius, sei ded annunziar immediat. Davos quels plaids de Placi restan entgins plaids e patratgs nunpronunziai.

Il pauper Hermann en pitgiras

Suenter haver giu priu il tschaffun denter las combas ei Hermann sepusaus encounter il grep e fatg tut sforz de sedustar della sien, denton sien e stauncladad domineschan. Buca che siu sien fussy staus quiets e profunds, na quel fuva levs ed irritaus. Pliras gadas eis el sedestadaus levet senza denton vegrn ord la sien da dretg. Ina gada seglia el ad ault secartend che gl'aug Luis hagi clamau el. Sentend il tschaffun denter sias combas secrei el gl'emprem mument ch'el seigi curdaus en sia prescha cun ina comba dalla vart fallida della comba dil letg giu. Il tschaffun fuva denton meins neidis ch'il pei dil letg e regorda beingleiti Hermann alla realitad. In immens cletg ha el giu de buca curdar sur la preit giu enten sedestadar. Ti benediu tschaffun di el tier sesez e vul puspei seplaccar e francar sia posiziun. Cheu auda el puspei a clamond siu num, quella gada clar e bein. Fitgond si'egliada pli pitgiv viado ella notg observa el vonzei ina brausla glisch ina toccada oragiu, ussa ina secunda ed ina tiarza. En pulita distanza ina da l'autra semovan las cazzolas che comparan e svaneschan. Ei stueva esser en la vischinanza della Muota. In crap croda da siu pèz. Igl agid ei cheu, jeu sun spindraus. Cun in griu che rebatti tochen giu en la val vul el dar sinzur a ses liberaturs. Buca pintga ei si'anguoscha disdend sia vusch dil taliter. Era ina secunda e tiarza

emprova han buca meglier success. Il strapaz, l'anguoscha e la freida notg han spussau el pli fetg che quei ch'el carteva. Tgei pegliar a mauns, igl agid aschi de maneivel e buca saver dar sinzur. Sche mo jeu vess silmeins in zulprin de dar fiug il tschaffun. Tut risvolver ils sacs gida nuot, in zulprin vegr buca neunavon. E schular: gie, schular, fuss bien sch'ins savess. Cheu vegr il Paulin endamen ad el. Lez saveva schular autruisa. Contas gadas veva Paulin vuliu mussar a Hermann de schular, e contas gadas haveva lez refusau d'emprender quei art de Paulin. Ussa, gest en quei mument dess el tut a Paulin, sch'el dumignass neuado in sulet schul. En sia paupra situaziun fa el il propiest d'emprender da Paulin il pli emprem de schular, sch'el vegni sauns e salvs ord la preit aulta. Las cazzolas leu giu vegnan pli e pli enasi encunter la preit e svaneschan plaun e plaun a Hermann ordad egl. Cun las cazzolas svaneschan era sias speronzas. Ei havess stuiu esser gronda casualitat ch'ils liberaturs havessen priu la via siaden ella preit ch'el fuva vegnius, e da sut la preit enasi pudevan ei nunpusseivel engartar el pli. Cheu vegr anetgamein ad el in grondius patratg.

La liberaziun

Mettamein encurevan ils umens sut la preit-crap enado quei che tuts speravan de buca anflar — ina bara —. Per aschiditg ch'els anflavan buca Hermann morts fuvan els nutri da speronzas sin speronzas. Mintgin che sepusava sin la fleivla speronza ch'ei succedi aunc ina miracla.

La tscherca negativa entschaveva a privar in e scadin della davosa speronza; cheu tuttenina lai Sep Deragisch curdar in griu da sias levzas. In utschac ner fuva sgulaus gest sper siu nas giu e setschentaus sut el sin in tschaffun. En sia tema ha Sep schau dar la latiarna odamaun en la gonda. Quei accident ha prest allarmau ils auters e bingleiti ein tuts stai sil plaz. Ei drova ina pulit'uriala avon che Sep seigi el cass de declarar il motiv de sia tema. El muossa sin il tschaffun e Balzer che fuva il pli maneivel tonscha ses mauns suenter igl utschac. Neunavon vegr el cun ina capetscha emplenida cun in dètg tschespet. Tuts miran in siper l'auter e legian la legria giud las fatschas. El viva — di Carli. Per mei sei mo in legn daco ch'el ha buca dau sinzur. Per gliez dat ei entgins motivs, di Placi

Truaisch. Jeu crei de saver nua ch'el ei. Cheusi en la preit dat ei in sulet plaz de star sur notg, jeu per mei vess aber pli bugen preferiu ina stanza o el hotel de Valtenigia che cheusi. Ussa dat ei buca de piarder temps. Ti Balzer vas peis a per enagiu la Muota e dattas segns cun la cazzola; cu ti veses che nus essan puspei ord la preit vas ti ton sco las combas pon trer giu a Planezzas e quieteschas il Luis e ses vischins. Ti Victor stattas cheu e fas adatg tgei che vegn aunc surengiu, ins po mai saver? Ti Carli vas cun tia grappa viaden encunter Rusnadebos e dattas da leu anora neuaden da costas della preit en, ti sas schon aschi nua ch'ins po neuaden. Jeu mon cun mes umens cheu suto e dun suenter enasi e da tschella vart en. S'orientar savein nus cun las cazzolas. Ed ussa vinavon!

Suenter haver giu sdermenau la capetscha sur la preit ora-
giu fuva Hermann sepusaus encunter il grep e tschentau il
tgau en omisdus mauns. Ditg e liung eis el staus en quella po-
siziun senza semuentar. Vonzei aulza el puspei il tgau e vesa
la cazzola giun la Muota. Quei vegn ad esser gl'aug Luis, tratga
el. Con bugen havess el dau sinzur, denton, era sche sia vusch
obedess ussa ad el, tochen giun la Muota fuss ei buca pusseivel
de sussentar enzatgi. Profundaus en tals patratgs ha el gnanc
observau las cazzolas sur el enasi, entochen ch'el ha buca udiu
a clamond siu num. Cun vusch aunc adina fleivla e brausla dat
el sinzur. Gest quei mument fa el il propiest de gie adina esser
buns cun gl'aug Luis.

Cun agen prighel de veta han ils umens liberau Hermann
ord sia penibla situaziun. Sin las biaras damondas ha el strusch
rispundi. Fetg tschintschus fuva el mai staus ed oz cuscheva
el stinadamein. Arrivai giun la Muota ha Carli danovamein
empruau de sligiar la faviala a Hermann. Sin las pli necessarias
damondas ha el lu dau risposta cuortamein. Capeivlamein se-
senteva el probabel pér ussa el segir.

Avon che sesparter tonscha Placi Truaisch sia butteglia de
vinars ch'el emblidava mai de prender en tals cass, e lai circular.
El fuva fetg cunts cun las prestaziuns de scadin e sesenteva
sez satisfatgs dil bien success. Senza gronda discussiun prend'ins
comiau in da l'auter. Placi e ses vischins prendan direcziun en-
cunter Plaunburschina, nua ch'ins vegn a spitgar sin els cun
marveglias e malpazienzia. Carli e Geli prenden Hermann en
lur miez e van precautamein encunter Planezzas. Sin via en-

cunter Planezzas han ils dus mats aunc intervegniu quei e tschei da Hermann, denton propi sligiar sia lieunga leva el aunc adina buc. Ils dus ménders han era buca insistiu pli bia sin grondas declaronzas, quei levan els lu surschar al Luis. Gia sur tegia a Planezzas ei schon in fried de caffe penetraus en siu nas, entrond en tegia stava il ruog gia sin meisa e dasperas paun e caschiel ed in dètg barcagl groma criua. Entrond Hermann va Luis ad el cul maun sur tgau vi senza dir in soli sulet plaid. Con bein che quei ha fatg a Hermann ha el detg pér gl'auter di a Paulin.

Il caffe cun groma han ils mats de Tumma e Mulins buca rufidau. Era Sep Maria e Luis han schau gustar ina scadiola, ferton che Paulin ha rufidau tut. Quel fuva naturalmein spa-niaus sin quei che suondi. Hermann ha buiu duas scadiolas latg e lu immediat ius a letg. Antruras fuss ei plitost stau uras de levar, pertgei ei entschaveva gest a fir dis. Oz dueva el denton star en letg tochen miezdi. Suenter esser stai sesurvi han ils bravs mats priu comiau da Planezzas, buca senza saver prender encunter plaids d'engraziament da Luis. Da ulteriuras bonificaziuns ein els desisti detschartamein.

Pér il di sissu han Hermann e Paulin giu caschun de dis-cuorer persuls sur della disgraziada notg. Quei ch'era buca reussiu als umens d'endriescher da Hermann ei reussiu a Paulin. Ils proxims dis ein els stai chignai ensemes sco aunc mai en tut quels onns che Hermann vegneva schon a Planezzas. Avon ch'ei carghi ad alp schulava Hermann dètg pulit cun dus dets. Adina puspei cu els vegnevan ensemes scheva Paulin — schula, schula, Hermann — ins sa mai.